

## /վարչական տույժ նշանակելու մասին/

«30» մարտի 2023թ

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետ Արտաշես Ղամբարյանս, ուսումնասիրելով «ԱՐՄՏԵՔՍԻԼ» ՍՊԸ-ի գլխավոր տնօրեն Արման Մանժուրի Գրիգորյանի (անձնագիր՝ BA3569824, ք.Երևան, Արցախի թաղամաս 56, էլեկտրոնային հասցե՝ armtextile77@gmail.com) կողմից մաքսային կանոնների խախտում կատարելու վերաբերյալ նյութերը,

**Պ Ա Ր Ձ Ե Ց Ի**

«ԱՐՄՏԵՔՍԻԼ» ՍՊԸ-ի անվամբ ներկայացված թիվ 05100040/100123/0000150 ապրանքների հայտարարագրով հայտարարագրված ապրանքները 2023 թվականի փետրվարի 01-ին ՀՀ ՊԵԿ ՀՄՎ մաքսային գործառնությունների բաժնի աշխատակիցների կողմից ենթարկվել են մաքսային զննման, որի արդյունքում պարզվել է, որ ապրանքների փաստացի քաշը 15000 կգ-ի փոխարեն 15499,5 կգ է, հետևաբար պակաս է հայտարարագրվել 499,5 կգ ապրանք: Վերոնշյալ ապրանքները չհայտարարագրելու արդյունքում առաջացել է **837 879 ՀՀ դրամի** չափով մաքսային վճարներ:

03.02.2023 թվականին ՀՀ ՊԵԿ ՀՄՎ մաքսային գործառնությունների բաժնի գլխավոր մաքսային տեսուչի կողմից «ԱՐՄՏԵՔՍԻԼ» ՍՊԸ-ի գլխավոր տնօրեն Արման Մանժուրի Գրիգորյանի նկատմամբ «Մաքսային կարգավորման մասին» ՀՀ օրենքի 316-րդ հոդվածի հատկանիշներով հարուցվել է մաքսային կանոնների խախտման վերաբերյալ վարույթ, այն է՝ ապրանքները կամ տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրում ոչ ճշգրիտ տեղեկություններ նշելը:

«Մաքսային կարգավորման մասին» ՀՀ օրենքի 301-րդ հոդվածի համաձայն՝ «Մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն: Ֆիզիկական և պաշտոնատար անձինք

մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության»:

«Մաքսային կարգավորման մասին» ՀՀ օրենքի 316-րդ հոդվածի 1-րդ մասի համաձայն՝ «Ապրանքները կամ տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրում ոչ ճշգրիտ տեղեկություններ նշելը, որի հետևանքով չի առաջանում մաքսային վճարների, մաքսային մարմինների կողմից գանձվող այլ հարկերի, տուրքերի և վճարների (բացառությամբ մաքսային մարմինների կողմից մաքսային գործառնությունների կատարման համար գանձվող պետական տուրքի) չհաշվարկում (պակաս հաշվարկում) կամ չվճարում (պակաս վճարում), ինչպես նաև արգելքների և սահմանափակումների, ոչ սակագնային կարգավորման միջոցների չկիրառում՝ հանցագործության հատկանիշների բացակայության դեպքում՝ առաջացնում է նախազգուշացում»:

«Մաքսային կարգավորման մասին» ՀՀ օրենքի 316-րդ հոդվածի 3-րդ մասի համաձայն՝ սույն հոդվածի 1-ին մասով սահմանված արարքը, որի հետևանքով առաջանում է մաքսային վճարների, մաքսային մարմինների կողմից գանձվող այլ հարկերի, տուրքերի և վճարների (բացառությամբ մաքսային մարմինների կողմից մաքսային գործառնությունների իրականացման համար գանձվող պետական տուրքի), տուրքերի չհաշվարկում (պակաս հաշվարկում) կամ չվճարում (պակաս վճարում)՝ հանցագործության հատկանիշների բացակայության դեպքում՝ առաջացնում է տուգանք՝ չհաշվարկված (պակաս հաշվարկված) կամ չվճարված (պակաս վճարված) մաքսային վճարների, մաքսային մարմինների կողմից գանձվող այլ հարկերի, տուրքերի և վճարների (բացառությամբ մաքսային մարմինների կողմից մաքսային գործառնությունների կատարման համար գանձվող պետական տուրքի) ընդհանուր գումարի քսան տոկոսի չափով, բայց ոչ պակաս, քան երեսուն հազար դրամի չափով:

«ԱՐՄՏԵՔՍԻԼ» ՍՊԸ-ի գլխավոր տնօրեն Արման Մանժուրի Գրիգորյանը 15.02.2023 թվականի թիվ 83 մտից համարի դիմումով խնդրել է թիվ 05100040/100123/0000150 ապրանքների հայտարարագրի հետ կապված վարչական վարույթի բոլոր նյութերը, այդ թվում՝ ծանուցագիրը, արձանագրությունը, վարչական ակտը ուղարկել /ծանուցել/ [armtextile77@gmail.com](mailto:armtextile77@gmail.com) էլեկտրոնային հասցեին: «ԱՐՄՏԵՔՍԻԼ» ՍՊԸ-ի գլխավոր տնօրեն Արման Մանժուրի Գրիգորյանը էլեկտրոնային փոստով [/armtextile77@gmail.com/](mailto:armtextile77@gmail.com) պատշաճ ծանուցվել է գործի քննության օրվա, վայրի և ժամի մասին, սակայն չի ներկայացել գործի քննությանը, գրավոր որևէ բացատրություն կամ դիրքորոշում չի ներկայացրել:

Վարչական գործի ուսումնասիրությունից պարզվել է, որ «ԱՐՄՏԵՔՍԻԼ» ՍՊԸ-ի գլխավոր տնօրեն Արման Մանժուրի Գրիգորյանի արարքում առկա է «Մաքսային կարգավորման մասին» ՀՀ օրենքի 316-րդ հոդվածի 3-րդ մասով նախատեսված զանցանքը, որի արդյունքում առաջացել է **837 879 ՀՀ դրամի** չափով մաքսային վճարների, չհաշվարկում:

Հիմք ընդունելով և ղեկավարվելով «Մաքսային կարգավորման մասին» ՀՀ օրենքի 316-րդ հոդվածի 3-րդ մասով, 322-րդ, 334-րդ հոդվածներով՝

### Ո Ր Ո Շ Ե Ց Ի

1. Արման Մանժուրի Գրիգորյանին «Մաքսային կարգավորման մասին» ՀՀ օրենքի 316-րդ հոդվածի 3-րդ մասով սահմանված մաքսային կանոնների խախտում կատարելու համար ենթարկել վարչական պատասխանատվության՝ տուգանել **167 580 ՀՀ դրամ** / $837879 \times 20\%$ /:

2. Որոշման մասին հայտնել Արման Մանժուրի Գրիգորյանին:

3. «Մաքսային կարգավորման մասին» ՀՀ օրենքի 334-րդ հոդվածի 2-րդ մասի համաձայն որոշումն ուժի մեջ է մտնում այն կայացնելու պահից:

4. «Մաքսային կարգավորման մասին» ՀՀ օրենքի 334-րդ հոդվածի 4-րդ մասի համաձայն «Վարչական տույժ նշանակելու մասին» մաքսային մարմինների որոշումը կարող է բողոքարկվել «Մաքսային ծառայության մասին» օրենքի 37-րդ հոդվածով սահմանված կարգով որոշումը ուժի մեջ մտնելու օրվանից՝ երկու ամսվա ընթացքում:

Սույն որոշմամբ նշանակված տուգանքի վճարման հաշվեհամարն է. **900005024055՝ 167 580 ՀՀ դրամ, նշել 30 կողք:**

ՀԱՐԱՎԱՅԻՆ ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ  
ՄԾ ԳՆԴԱՊԵՏ

ԱՐՏԱՇԵՍ ՂԱՄԲԱՐՅԱՆ